

LA BONTA DE MISTRAL

L'ABAT J. IMBERT
Canoungè titulàri de-z-Ais

A L'OUSTAU - EMÉ LOU PUBLI – DINS L'ISTITUCIOUN E LOU TRACHIMEN DÓU
FELIBRIGE

Éloge pronouncia dins la Glèiso de Maiano pèr lou dès-e-vuechen anniversàri de la mort de Frederi Mistral, lou vint-e-nòu de Mars 1932.

MI FRAIRE,

Dins aquest dès-e-vuechen anniversàri funerau decebrai belèu vosto atèndo, se noun vous parle de la grandour de Mistral.

Aquelo grandour que raïouno de soun gèni, de sis obro e de soun acioun, li fèsto dóu Centenàri, emé li discours que se ié soun pronouncia, li libre que soun espeli au soufle mistralen, lis article di journau e di revisto, l'an facho trelusi davans, lis iue de la Prouvènço, de la Franço e dóu mounde entié. Es un sujet, lou sabe proun, vaste que-noun-sai, e pamens de mai voulé me i'encamina sarié pèr iéu pourta d'aigo à la mar.

Mais soun amo, sa bello amo, se pourrié-ti pas, emé l'ajudo dóu bon Diéu e de Santo Estello, assaja de n'en penetra lou santuàri? Tenès, li pagan, pièi après éli, li crestian an coumpres que la grandour fai pas tout: es d'acò que subre lou frountoun de si tèmples avien l'abitudò, pèr defini la naturo de l'Èstre divin, de grava tres gràndi letro un D, un O, un M, qu'acò vòu dire **Deo Optimo Maximo**, au Diéu mai que bon, au Dién mai que grand.

Me permetrai, pèr vosto edificacioun de faire uno coumparitudo respetouso de Diéu emé sa creaturo. Noun, sarié pas coumplèto la glòri de Mistral, se nous n'en tenian rèn qu'à ço qu'avès tant bèn di e tant bèn escri, bràvi felibre, disciple fidèu dóu Mèstre: à Mistral subre-grand.

Voulès-ti que sus l'umble mounumen que dins moun cor i'ai auboura, e que me prepausa de moustra à vòsti bèus iue vesènt, grave à moun tour uno paraulo, aquesto d'eici: à Mistral subre-bon? La bounta de Mistral sara lou tèmo d'aquest óumage. Coumençen.

*

* *